

INUIT ATAQATIGIIT

INATSISARTUNI



UPA16/102
2. maj 2016
Peter Olsen

Uunga siunnersuut: Inuussutissarsiutinik ingerlatsisutut aningaasaateqarfiit pillugit inatsisip atuutsilernissaa pillugu Kalaallit Nunaannut peqqusummut oqaaseqaatissamut Inatsisartut aalajangiiffigisassaattut siunnersuut.
(Inuussutissarsiortermut, Suliffeqarnermut Niuernermut Nunanullu Allanut Naalakkersuisoq)

Oqaluuserisassaq qulaani pineqartoq matumuuna Inuit Ataqatigiinnit imatut oqaaseqarfigissavarput.

Suliassap qulaani pineqartup suliarineqarnissaa pillugu 2013-mi suleqatigiinnik pilersitsisoqarsimavoq.

Piginneqatigiiffiit pillugit inatsisip ullumikkut atuuttup ullumikkumut naleqqukkunnaarsimanera suliakkiussisimanermut tunngaviusimalluni. Suleqatigiit suliaat naammassisimalerpoq, massakkullu tassa saqqummiunneqarsimalerpoq.

Inuussutissarsiutinik ingerlatsisutut aningaasaateqarfiit pillugit inatsisissap matuma atuutilersinniarneqartup, nunatsinni inuussutissarsiornikkut ineriertortitsinerup sukkanerusumik ajornannginnerusumillu ineriertortinneqarsinnaalernissaa siunertaralugu piginneqatigiilluni ingerlateqatigiiffiit pillugit inatsisip nutarterneqarneranut ilaaginnarpoq.

Inuussutissarsioriaatsit assigiinngitsut assigiinnerusunik malittarissaqalernissaat taamatut nutarterinermi siunertaavoq

Inuussutissarsiutinik ingerlatsisutut aningaasaateqarfiit nutaamik inatsisiliuunneqarnerat ilaatigut imatut kinguneqartussaavoq:

- Piginneqatigiilluni ingerlatseqatigiiffinnut inatsit assigalugu (selskabslovgivningen) inuussutissarsiutinik ingerlatsisut aningaasaateqarfiit pillugit tunngaviusumik inatsisaata nutarterneqarnera.
- Siulersuisut suliassaannut agguataarneqarnerannullu tunngasut ammanerulersinneqarput.
- Siulersuisut sanilliullugu aningaasaateqarfimmi oqartussaasut periarfissaasa nukitorsarneqarnerat
- Inuussussarsiutinik ingerlatsisut aningaasaateqarfiat pillugu qanga inatsisaasumi erseqqisumik allassimasoqanngilaq qanoq ilinikkut aningaasaateqarfik aningaasaateqarfiusarnersoq
- Paasissutissanut assigiinngitsunut aningaasaateqarfimmut tunngasut, qaqugukkut kingusinnerpaamik nalunaarutigineqartarnissaannut malittarisassat nutarterneqarput, sap. ak. qassit sioqqullugit qaammatit qassit sioqqullugit il.il.

Naatsumik oqaatigalugu inatsisissaq nutaaq saqqummiunneqartoq nutarterinerullunilu ullumikkumut naleqqussaanerusoq, Inuit Ataqatigiinnit isumaqarpugut tapersorsorparpullu.

Taamatut oqaariarluta, illuatungaatigut: nunami namminersulersimasutut, nunattalu namminiilivikkartuaarnissaanik pingaartitsisutut, anguniagaqartutullu pinngitsoorusunngilanga quelequtaq pillugu eqqarsaatersuuteqalaarnissannut.

Naalakkersuisunut apeqqutigerusunnarpoq suliassanut tamakkununnga tunngasut, qaqugumita uagut nammineq tamakku akisussaaffigilersinnaaavagut. Tassami inatsisit

pineqartoq qallunaat nunaata oqartussaaffiata suli ataaniippoq, kunngip peqqussutaanut tunngasuullutik, folketingimilu suliarineqartartut, taamaallaallu uagut nunatsinnut tunngasumut oqaaseqaatissatsinnik siunnersuuteqaannartuulluta. Tamanna pissusissamisoornerpa nunamut namminiileriartuaartumut?

Tamanna pillugu Inuit Ataqatigiinnit paaserusupparput naalakkersuisut pilersaaruteqarnersut oqartussaaffiup matuma nunatsinnut angerlaanneqarsinnaanera eqqarsaatigalugu, angerlaanneqassagaluarpongallu tamatuma aningaasatigut, allaffissornikkullu kingunissai pillugit paasiniarneqarsimanersoq, imaluunniit paasiniaasoqarumaarnersoq.

Piffissanngunginnerpa oqartussaaffiup uagut nammineq tigunissaanut? Naalakkersuisummita tamanna pillugu qanoq isumaqarpat?

Tamatut oqaaseqaateqarluta Inuit Ataqatigiinnit ataatsimiisitaliamut qimerluugassanngorlugu ingerlateqqipparput.

Qujanaq

Peter Olsen